

## Crynodeb Gweithredol

### 1. Cyd-destun

Partneriaeth yw Tîm Cymorth Pobl Dduon a Lleiafrifoedd Ethnig (BEST) o bedwar mudiad: Cymdeithas Lleiafrifoedd Ethnig Cymru Gyfan (AWEMA), Rhwydwaith Sector Gwirfoddol i Bobl Croenddu Cymru (BVSNW), Rhwydwaith Menywod o Leiafrifoedd Ethnig Cymru (MEWN Cymru) ac Ymddiriedolaeth Scarman. Prosiect a ariennir gan Cymunedau'n Gyntaf yw BEST, sy'n amcanu i adnabod anghenion cymorth penodol unigolion a chymunedau Pobl Dduon a Lleiafrifoedd Ethnig (BME)<sup>1</sup>, mewn perthynas â Strategaeth Cymunedau'n Gyntaf Llywodraeth Cynulliad Cymru. Ymgwymerwyd â'r ymchwil gan Rwydwaith Cydraddoldeb Hiliol Gogledd Cymru (NWREN), a fu'n cydweithio gydag Ysgol Gwyddorau Cymdeithas Prifysgol Cymru, Bangor.

### 2. Nodau

Nodau sylfaenol yr ymchwil oedd:

- Darparu gwybodaeth ansoddol a meintioliol am gymunedau BME yng Ngogledd Cymru.
- Darparu gwybodaeth am y strwythurau cymorth penodol sy'n bod ar gyfer cymunedau BME yn yr ardal.
- Sefydlu cysylltiadau o fewn partneriaeth Cymunedau'n Gyntaf yng ngogledd Cymru, er mwyn canfod pa gymorth a chefnogaeth sydd arnynt eu hangen er mwyn ymgysylltu â chymunedau BME.
- Adnabod natur a photensial y partneriaethau y bydd angen i BEST eu sefydlu er mwyn gweithio'n effeithiol o fewn ardaloedd Cymunedau'n Gyntaf yng ngogledd Cymru.

### 3. Methodoleg

Mae ardal yr ymchwil yn cwmpasu chwe sir gogledd Cymru, sef Conwy, Sir Ddinbych, Gwynedd, Sir y Fflint, Ynys Môn a Wrecsam.

Cynhaliwyd arolwg o'r llenyddiaeth er mwyn dod o hyd i'r prosiectau ymchwil allweddol ar leiafrifoedd BME yng ngogledd Cymru yn ogystal ag ymchwil perthnasol arall ar gymunedau BME trwy Gymru gyfan. Gwnaed dadansoddiad ar-ddesg o'r data a ddarparwyd yng Nghyfrifiad 2001 er mwyn sefydlu proffil demograffig manwl o'r lleiafrifoedd BME yn yr ardal. Dadansoddiwyd data o'r cyfrifiad am gyfansoddiad, amllder, oed, rhyw, crefydd a statws economaidd-gymdeithasol y lleiafrifoedd. Trwy groesdablu edrychwyd ar oedran a rhyw fesul grŵp ethnig, ac ar ryw a statws economaidd-gymdeithasol fesul grŵp ethnig. Rhai o'r ffontionellau data eraill a

---

<sup>1</sup> Trwy gydol y ddogfen hon, defnyddir y term 'BME' neu 'Pobl Dduon a Lleiafrifoedd Ethnig' i gyfeirio at y cymunedau ethnig gwledol a geir yng ngogledd Cymru, er enghraifft pobl o darddiad Pacistanaid, Bangladeshi, Tsieinaidd, Affricanaidd, Caribiaidd a Philipinaidd. Defnyddir y term i gyfeirio hefyd at grwpiau nad ydynt yn wahanol yn weledol ond sydd hefyd yn dioddef anfanteision oherwydd eu statws lleiafrifol, megis ceiswyr lloches, ffoaduriaid, teithwyr neu sipsiwn neu fewnfudwyr newydd.

ddefnyddiwyd i adnabod y BME yn yr ardaloedd Cymunedau'n Gyntaf oedd cofnodion myfyrwyr, er mwyn canfod y niferoedd yn y prif sefydliadau addysgol, cofnodion gweithwyr cyflogedig y GIG a gwybodaeth am gymunedau o sipsiwn/teithwyr, ffoaduriaid a cheiswyr lloches.

Dadansoddiwyd yr holl ddata ystadegol gan ddefnyddio data canran EXCEL. Ar gyfer mapio poblogaeth a chyfansoddiad BME gogledd Cymru ar lefel wardiau, siroedd a rhanbarthau, defnyddiwyd pecyn GIS (System Wybodaeth Ddaearyddol) i'w plotio fel coroplethau.

Casglwyd y data ansoddol trwy gynnal cyfweiliadau lled-strwythuredig gyda rhanddeiliaid allweddol: darparwyr gwasanaeth, asiantaethau BME ac unigolion BME, gan gynnwys unigolion BME a oedd yn byw mewn ardaloedd Cymunedau'n Gyntaf. Cynhaliwyd y rhan fwyaf o'r cyfweiliadau wyneb yn wyneb. Pan oedd hynny'n amhosibl neu'n anymarferol am ba bynnag reswm, cynhaliwyd y cyfweiliad dros y teleffon. Cynhaliwyd nifer o drafodaethau grŵp ffocws yn ogystal, gyda cheiswyr lloches, myfyrwyr rhyngwladol, aelodau o Shekina a'r Gymdeithas Tsieineaidd.

## 4. Materion Allweddol yn Codi o'r Ymchwil

### 4.1 Ymchwil

Mae nifer o brosiectau ymchwil a oedd yn canolbwyntio ar ogledd Cymru wedi eu cynnal neu'n digwydd ar hyn o bryd. Mae proffil pendant o wahanol anghenion y BME bellach ar gael. Er hynny, mae'r data a gyflwynir yn yr adroddiadau yn amrywio'n sylweddol, sy'n awgrymu nad yw'r setiau data - ac yn arbennig y systemau monitro a ddefnyddir wedi eu safoni ar draws yr awdurdodau lleol/rhanddeiliaid perthnasol. Sylwir ar lawer o orgyffwrdd rhwng yr adroddiadau, a hwyrach y gellid casglu data'n fwy effeithlon trwy gydgyssylltu'r ymdrechion yn well. Pery'r angen am ymchwil yn canolbwyntio ar y lleiafrifoedd BME a chymorth gyda Thechnoleg Gwybodaeth a Chyfathrebu (TGCh). Nid oes yr un o'r arolygon cyfredol yng Nghymru yn ymdrin yn systematig ag anghenion TGCh y BME. Mae llawer o'r prosiectau ymchwil wedi'u cyllido'n annigonol ac yn digwydd o fewn fframweithiau amser sy'n rhy fyr i ddarparu data ystyrlon. Dywed rhai unigolion ac asiantaethau BME eu bod yn cael eu hymchwilio yn ormodol. Nid yw canlyniadau'r ymchwil yn cael eu dosbarthu'n eang, na'u rhannu i weithwyr prosiect o fewn gogledd Cymru, nac i'r mwyafrif o'r asiantaethau statudol. Mae BSVNW ac NWREN yn gweithredu i gau'r bwlch hwn yn y trefniadau cyfathrebu trwy drefnu gweithgareddau fel diwrnodau rhannu gwybodaeth ar gyfer gweithwyr prosiect.

### 4.2 Y proffil demograffig

Mae'r amrywiaeth o ran grŵp ethnig a statws, a natur wasgaredig y boblogaeth BME trwy'r awdurdodau lleol yng ngogledd Cymru yn cynnig cryn her i ddarparwyr prif-ffrwd. Cymharol ifanc ac economaidd weithgar yw poblogaeth BME gogledd Cymru. Nid oes unrhyw dystiolaeth ystadegol i awgrymu bod nifer y dibynyddion hyn yn uchel. Fel sy'n wir am y boblogaeth yn gyffredinol mae'r poblogaeth BME yn amlygu llif a chyfnawid o ran mewnfudo ac allfudo, ond y mae craidd y boblogaeth BME yn un hir

sefydledig. Cristnogion yw'r grŵp crefyddol mwyaf ym mhlith y BME, ac yna Moslemiaid. Amcangyfrifir fod 24 o ieithoedd lleiafrifol yn cael eu siarad yn gyffredin yng ngogledd Cymru. Amodol ac ansicr yw'r data sydd ar gael ar weithwyr symudol, sipsiwn/teithwyr, ffoaduriaid a cheiswyr lloches. Nid yw'r data swyddogol yn darparu darlun cynhwysfawr o'r BME yn yr ardal.

Nid yw'r patrymau o dlodi ac anfantais sy'n gyffredin i gymunedau BME mewn rhannau eraill o Gymru a'r DU yn digwydd yn systematig ymhlith 'grwpiau' yng ngogledd Cymru. Ar wahân i Orllewin y Rhyl a Shotton Uchaf nid oes crynadau sylweddol o'r BME mewn ardaloedd Cymunedau'n Gyntaf yng ngogledd Cymru. Deuddeg y cant yn unig o'r boblogaeth BME yng ngogledd Cymru (799 o unigolion) sy'n byw yn yr ardaloedd Cymunedau'n Gyntaf.

Mae tystiolaeth sy'n awgrymu bod nifer o weithwyr symudol yn bresennol yr ardal, er enghraifft, Philipiniaid, bobl o Ddwyrain Ewrop, ceiswyr lloches a ffoaduriaid. Bydd gofyn rhoi sylw i anghenion yr ymfudwyr newydd pan ddônt i'r amlwg.

Ffactor allweddol ynglŷn â'r pwysau sydd ar y BME yn yr ardal, a'u disgwyliadau, yw ynysu oddi wrth y rhwydweithiau cymorth. Mae materion fel hiliaeth, unigrwydd a darparu gwybodaeth a chyingor yn galw am ddarparu gwasanaethau

cymorth penodol. Mae'r gofynion statudol yn mynnu y dylid diwallu anghenion cymorth o'r fath hyd yn oed pan fo'r BME yn ychydig o ran nifer. Nid yw niferoedd bach yn gyfystyr ag anghenion bach.

### 4.3 Yr ardaloedd Cymunedau'n Gyntaf

Mae'r nifer o unigolion BME sy'n byw yn ardaloedd Cymunedau'n Gyntaf yn isel yn gyffredinol ar wahân i Orllewin y Rhyl, De Orllewin y Rhyl a Shotton Uchaf. Deuddeg y cant yn unig o'r boblogaeth BME yng ngogledd Cymru sydd yn byw yn yr ardaloedd Cymunedau'n Gyntaf. Mae'r ymwybyddiaeth o amcanion a phwrpas Cymunedau'n Gyntaf ym mhlith y cyhoedd yn gyffredinol yn isel, ond ym mhlith y BME mae'n arwyddocaol is. Gwneir ymdrechion i ddod i gysylltiad â lleiafrifoedd i geisio esbonio agweddau ar y strategaeth gwrth-dlodi bwysig hon iddynt<sup>2</sup>. Mae gwahaniaethau arwyddocaol rhwng canfyddiadau ac anghenion y cymunedau BME sefydledig a'r mewnfudwyr diweddar. Nid yw'r cymdeithasau gwirfoddol BME yn ymwneud llawer â Chymunedau'n Gyntaf. Yn ddiweddar iawn y penodwyd Cydlynwyr ac y ffurfiwyd partneriaethau, ac y mae'r trefniadau hyn yn dal i esblygu. Mae llawer o'r Cydlynwyr eto braidd wedi eu hynysu, ac y mae diffyg cynllunio strategol trwy'r rhanbarth ar faterion cydraddoldeb penodol.

Mae diffyg arwyddocaol yn y gefnogaeth a roddir i'r Cydlynwyr o ran hyfforddiant, cyngor a gwybodaeth. Mae'r Cydlynwyr yn brin o'r sgiliau angenrheidiol i adnabod a mynd i'r afael â materion cydraddoldeb, ac y mae ffynonellau arbenigedd a chefnogaeth allanol hefyd yn brin yn yr ardal. Annigonol neu absennol yw'r peirianwaith ar gyfer rhannu arferion da.

<sup>2</sup> Cydlynwydd BVSNW/ Rhwydwaith Cymorth Cymunedau'n Gyntaf (CFSN).

Ar hyn o bryd un, yn unig, o'r 26 cydlynedd Cymunedau'n Gyntaf yn ardal gogledd Cymru sydd o gefndir BME. Mae cynrychiolaeth y BME ar fyrddau Cymunedau'n Gyntaf yn isel neu'n absennol. Nid oes data a drefnir yn ganolog sy'n datgelu nifer y BME ar fyrddau a phwyllgorau Cymunedau'n Gyntaf. Un aelod pwyllgor/bwrdd yn unig o'r BME a ganfuwyd yn ystod yr ymchwil hwn.

#### 4.4 Strwythurau cymorth i'r BME yng ngogledd Cymru

Mae nifer o gymdeithasu BME yn gweithredu yng ngogledd Cymru ond maent yn amrywio yn sylweddol o ran eu trefniadaeth fewnol, nifer eu haelodau a'u gweithgareddau. Yn gyffredinol, nid oes gan yr asiantaethau BME alluoedd digonol i gwrdd â'r galw cynyddol sydd arnynt i ddarparu cyngor, ymgynghori a chynnig cymorth. Mae cyrff megis awdurdodau lleol, CABx a'r system gyfiawnder troseddol yn ystyried NWREN a Shekina yn ddarparwyr critigol. Fel a nodwyd eisoes, mae rhai cyrff BME yn sôn eu bod yn destun gormod o ymchwilio ac ymgynghori, a'u bod hefyd yn brin o gyllid cynaliadwy. Mae'r cysylltiadau rhwng yr asiantaethau BME yn parhau'n wan, sy'n achosi'r posibilrwydd o ddyblygu ymdrechion ac yn rhwystro cynllunio strategol.

Annelwig yw'r cyswllt rhwng y gymuned BME sefydledig a'r cymdeithasau BME; ac isel yw aelodaeth y cymdeithasau o ystyried maint y boblogaeth BME. Dyfeisiodd rhai unigolion BME eu ffyrdd unigryw eu hunain o sefydlu rhwydweithiau er mwyn diwallu eu hanghenion personol. Mae peth o ddylanwad y cymdeithasau'n tarddu o'r tu hwnt i ffiniau Cymru, o sefydliadau ar gyfer y DU gyfan, neu fudiadau rhyngwladol. Mae'r anghenion na ddiwellir yn sylweddol ymhlith mewnfudwyr BME diweddar, ac nid yw'r rhain eto'n cael sylw gan y cyrff lleiafrifol arbenigol nac ychwaith gan y sefydliadau prif-ffrwd.

Ynglŷn â chefnogaeth TGCh i'r BME, ni wnaed unrhyw ymchwil empirig hyd yma yng ngogledd Cymru<sup>3</sup>.

Mae nifer o weithwyr datblygu sy'n gysylltiedig â mudiadau gwirfoddol Cymru-gyfan yn weithgar yn yr ardal.

Araf yw'r Asiantaethau prif-ffrwd i ymateb i'w dyletswyddau statudol, ond maent bellach yn fwy ymwybodol o'r gofynion sydd arnynt ac wedi symud gwahanol bellteroedd i gyfeiriad ymgysylltu ag unigolion a chymunedau BME.

Gan mai cyfnod cynnar yw'r presennol, o ran casglu gwybodaeth ar gyfer monitro, ychydig a wnaed hyd yma i werthuso'r data hyn er mwyn arwain polisi. Prin fod unrhyw ddatblygiadau neu fentrau newydd ar droed er mwyn cwrdd ag anghenion y BME. Ychydig o bartneriaeth strategol trawsawdurdod neu ryngasiantaethol sy'n bod i ymateb i'r anghenion yn yr ardal. Dywedir bod y cysylltiadau gydag unigolion a chymunedau BME yn parhau'n wan, ac isel yw cynrychiolaeth y BME ar fyrddau a phwyllgorau oddi mewn i sefydliadau prif-ffrwd. Mae'n amlwg fod angen datblygu sgiliau a hyfforddiant, sefydlu fforymau i rannu arbenigedd a gwybodaeth, a gwneud

<sup>3</sup> Nid yw *Anghydraddoldeb Rhyngrywyd yng Nghymru* (a ddiwedderir yn flynyddol) gan Gyngor Defnyddwyr Cymru, na *Net gain? Access to and use of the Internet in Wales*, hefyd gan Gyngor Defnyddwyr Cymru, yn darparu unrhyw wybodaeth yn ôl grŵp ethnig.

modelau ymgynghori effeithiol yn rhan sefydlog o'r drefn. Ystyrir y modelau ymgysylltu presennol yn aneffeithiol gan yr asiantaethau prif-ffrwd a'r BME. Prin yw'r dystiolaeth yr ymgwymerir ag unrhyw waith allgymorth gan yr asiantaethau prif-ffrwd.

#### 4.5 Ymgynghori gyda chymunedau BME

Nodwyd fod gan y rhan fwyaf o'r asiantaethau prif ffrwd ryw fath o drefniadaeth i ymgysylltu â safbwyntiau'r BME, er bod pob un yn cyfeirio at anawsterau ynglŷn â'u hymdrechion i ymgynghori. Soniwyd am nifer o wahanol rwystrau, rhai ohonynt yn tarddu o'r cymunedau BME eu hunain ac eraill yn ganlyniad gweithred neu anwaith yr asiantaeth. Y rhwystr a nodwyd amlaf oedd amrywiaeth a natur wasgaredig y cymunedau BME o fewn gogledd Cymru. Rhwystrau eraill a ganfuwyd oedd y diffyg gwybodaeth o fewn cymunedau BME ynghylch pwrpas a dull ymgynghori; diffyg hyder, ymddiriedaeth a/neu'r galluedd i gymryd rhan ym mhlith y BME; diffyg hyblygrwydd yn y trefniadau ar gyfer ymgynghori, a diffyg cynrychiolaeth o'r BME ar gyrff cyhoeddus. Amheuai'r BME a oedd canlyniadau'r ymgynghori yn dylanwadu ar eu bywydau beunyddiol mewn gwirionedd. Cyfeiriwyd yn aml at ludedd ymgynghori. Mae'r asiantaethau yn gweithredu gan ddefnyddio modelau ymgysylltu cyfyngedig iawn, ac y mae gofyn iddynt sefydlu methodolegau newydd ac aml-haen.

#### 5. Y ffordd ymlaen

Rhaid gweithredu ar nifer o lefelau i wella'r sefyllfa hon. Mae achos clir o blaid ddatblygu cynghreiriau strategol ar draws y rhanbarth er mwyn gallu ymateb mewn ffordd gydlynol a chytûn i ofynion lleiafrifoedd. Dylid rhannu arferion da. Mae cyfleoedd hefyd i rannu digwyddiadau hyfforddi ac arbenigedd. Mae angen cysoni'r offerynnau monitro. Dylid arbrofi gyda dulliau mwy dyfeisgar ac amrywiol ar gyfer ymgynghori a hyrwyddo cyfranogi.

Rhaid adeiladu galluedd unigolion a chymunedau BME o'r tu mewn i'r clystyrau o gymdeithasau sydd eisoes yn bodoli, adnabod yr arbenigedd sydd ar gael a datblygu cysylltiadau newydd. Dylid rhoi sylw i'r peryglon o ddyblygu gwaith, disgwyliadau afrealistig a lludedd ymgynghori, sy'n nodweddu'r system ar hyn o bryd. Rhaid ymdrechu'n galetach i adeiladu cysylltiadau cyfathrebu cynaliadwy gyda chyfranogwyr allweddol er mwyn gwella ymddiriedaeth a hyder. Gellir cryfhau'r cymhelliad i gymryd rhan trwy sicrhau cynrychiolaeth i'r BME ar gyrff cyhoeddus yn yr ardal, gan gynnwys y byrddau Cymunedau'n Gyntaf.

Mae angen cefnogaeth frys ar unwaith i Gydlynwyr y fenter Cymunedau'n Gyntaf er mwyn datblygu eu hymwybyddiaeth a'u sgiliau o ran ymgysylltu â'r BME ac adnabod arferion sy'n camwahanuaethu. Rhaid sefydlu hyfforddiant gorfodol yn ddi-oed. Dylid diwygio'r dogfennau arweiniol er mwyn tanlinellu pwysigrwydd materion cydraddoldeb ym mhob rhan o Gymru, hyd yn oed lle mae niferoedd y BME yn isel. Rhaid sefydlu ffynonellau cymorth cydnabyddedig er mwyn sicrhau y gall y Cydlynwyr gyflawni'r disgwyliadau hyn. Rhaid creu isadeiledd a fydd yn caniatáu mynd i'r afael yn strategol â materion cydraddoldeb ym mhob ardal Cymunedau'n Gyntaf, a rhannu a lledaenu arferion da. Dylid datblygu cysylltiadau cryfach gyda'r asiantaethau BME allweddol yn y rhanbarth.

## 6. Argymhellion allweddol

- Dylid mabwysiadu dull mwy cydlynol ar gyfer ymgymryd ag ymchwil yn yr ardal.
- Dylid datblygu trefniant mwy systematig ar gyfer rhannu allbwn gweithgarwch ymchwil (gan gynnwys setiau data pan fo modd) gydag asiantaethau ac unigolion sy'n cymryd rhan yn yr ymchwil.
- Dylid cynnal ymchwil i anghenion penodol y BME a'r gefnogaeth TGCh yng Nghymru.
- Gall diffyg ffynhonnell ddata ganolog ac unedig achosi anawsterau gyda chymariaethau traws-grŵp. Dylai'r asiantaethau mwyaf, yn enwedig, ymdrechu i safoni eu dulliau o gasglu data a'u systemau monitro.
- Dylai awdurdodau sy'n ymateb i bresenoldeb y BME edrych y tu hwnt i'r ddata rhifol a gesglir o'r ffynonellau ystadegol 'swyddogol'.
- Dylai'r cyrff perthnasol sefydlu amrediad o fecanweithiau ymgynghori hyblyg cydnabyddedig, megis y rhai y cyfeirir atynt ar dudalen 66 yn yr adroddiad hwn.
- Dylid sicrhau cyllid ac adnoddau priodol er mwyn cynnal mecanweithiau ymgynghori effeithiol.
- Mae angen corff rhwydwaith cynaliadwy yn y rhanbarth, gydag adnoddau digonol i fod yn ffynhonnell gwybodaeth ac arbenigedd yn ogystal ag arwyddbost allweddol at asiantaethau cymorth arbenigol, ar gyfer unigolion BME ac ar gyfer asiantaethau a gweithwyr proffesiynol sy'n chwilio am gymorth. Mae gan nifer o'r cyrff presennol (NWREN, er enghraifft) y potensial i ddarparu'r canolbwynt hwn.
- Dylid datblygu fforwm i weithwyr asiantaethau prif-ffrwd a gweithwyr maes cyffredin BME trwy'r ardal, ar gyfer rhannu gwybodaeth, cefnogaeth, hyfforddiant ac arferion da.

Yn ychwanegol, mae nifer o argymhellion sy'n ymwneud yn benodol â Chymunedau'n Gyntaf:

- **Recriwtio a hyfforddi**

Dylid sicrhau bod Cydlynwyr Cymunedau'n Gyntaf, wrth eu recriwtio, yn ymwybodol o faterion cyfleoedd cyfartal. Dylid cynnwys datganiadau a chanllawiau mwy penodol yn y Llawlyfr Arweiniad Cymunedau'n Gyntaf.

Pan fo gwybodaeth a sgiliau yn brin o'r safon, dylid darparu hyfforddiant addas. Dylai hyfforddiant rheolaidd a pherthnasol fod yn orfodol, ar faterion penodol i'r BME yn ogystal â materion cydraddoldeb eraill.

#### ▪ **Cymorth i bartneriaethau Cymunedau'n Gyntaf**

Mae'r trefniadau presennol, i ddarparu cymorth o Gaerdydd trwy Gydlynnydd y Rhwydwaith Cymorth Cymunedau'n Gyntaf, yn annigonol. Dylai BEST ystyried sut y gallant ddefnyddio gweithwyr datblygu ac asiantaethau yn ardal gogledd Cymru i ddarparu mecanweithiau cymorth ffurfiol i'r partneriaeth Cymunedau'n Gyntaf.

#### ▪ **Dulliau ymgysylltu**

Dylid ymdrechu'n galetach i ymgysylltu'n rhagweithiol gyda holl aelodau'r gymuned, ac annog pob grŵp lleiafrifol i chwarae rhan ymarferol. Dylid canfod dulliau gwahanol o ymgysylltu, a'u defnyddio i sicrhau bod amrediad eang o fuddiannau ac anghenion yn cael eu diwallu.

#### ▪ **Gweithredu'n gadarnhaol i hyrwyddo'r rhaglen Cymunedau'n Gyntaf i bob grŵp cymunedol**

Dylid gwneud mwy i ofalu fod manteision rhaglen Cymunedau'n Gyntaf yn hysbys i'r gymuned yn gyffredinol. Gellid gwneud hyn trwy ddefnyddio'r cyfryngau lleol, canolfannau cymunedol, a thrwy ddarparu gwybodaeth yn rheolaidd i fudiadau gwirfoddol yn yr ardal.

Dylid gwneud rhagor i sicrhau gwell cynrychiolaeth i bobl o gefndir BME ar y byrddau Cymunedau'n Gyntaf ac, os oes modd, ym mhlith y Cydlynwyr.

#### ▪ **Monitro a gwerthuso unedig**

Dylid sefydlu strwythurau a mecanweithiau i alluogi'r holl Gydlynwyr Cymunedau'n Gyntaf i fonitro a gwerthuso eu lwyddiant o ran ymgysylltu â chymunedau BME.

#### ▪ **Amcanion eglur clir sy'n berthnasol i anghenion penodol y rhanbarth**

Mae'r nifer fach o'r BME sy'n byw mewn ardaloedd Cymunedau'n Gyntaf yn codi materion sy'n nodweddiadol o'r rhanbarth ac yn galw am ddull gweithredu gwahanol i'r un a ddefnyddir yn Ne Cymru. Dylid annog Cydlynwyr Cymunedau'n Gyntaf gael eu hannog i ddatblygu dull strategol ar gyfer ymgysylltu â'r BME yn y rhanbarth, sy'n caniatáu rhannu sgiliau a gwybodaeth, a chadarnhau'r arferion gorau.